

KALATE LALE YÔHANES A NGA TILI

Mebatan

(Mat 10 : 40-42 ; Filé 1-7)

1 Me mwendé, m'atili Gayus m'anye'e, nyô mamien m'anye'e e benya mejôô été. 2 A nyô m'anye'e, m'aye'elane na mam môé mese me ke mvo'é, a na ô nyiñe mvo'é e minsôn ; aval ane nsisime wôé w'abu'uban. 3 Amu me nga va'a beta mevak éyoñ bevo'o ya bobejañ be nga suan, be nga kañete benya mefoé ya ényiñe jôé, aval ane w'atu'a tôñe benya mejôô. 4 Me nji bi beta meva'a mefe be ne dañe balé, aval ane m'awô'ô na bone bam b'atôñe benya mejôô.

Afañe Gayus d'abendeban

5 A nyô m'anye'e, e ne jame ya ndinlem ane w'asaane bobejañe bete, adañedañ beyeñ, 6 mmbe be nga kañete foé ya nye'ane wôé asu kirke. W'abo mvaé ane w'alitane be e zene ya dulu dab avale d'ayian e be Zambe. 7 Amu be nga ke dulu ete amu jôé dé, te kañese nyoñe jôm éziñ e be biku. 8 Ajô ete bi ayiane volô aka'a bôt ete , nde bi aye bo beébe bebobisaé ya benya mejôô.

Zuñ'a Diôtréfé

9 me maneya tili kirké mam me éziñ, ve Diôtréfé a nye'e a tel'é émien ôsu, a nji kañese éjôé jam. 10 Nde nge m'azu, m'aye simesane nye jam a bo le, aval ane a ne'e me mbia bifia e nyô, émien a bene fe nyoñe bobejañ, a kamane fe ba b'akômbô be nyoñ, a titane be e kirke.

Mbamba jôé Démétrius

11 A nyô m'anye'e, ô bo te vu abé ve mvaé. Nyô a bo mvaé nnye a ne nyôa Zambe ; nyô a bo abé nnye a ngenane te yene Zambe. 12 Démétrius a bili mbamaba jôé e be mô't ase, a e be benya mejôô bebien ; mamiene fe m'akañete nalé ajô dé, w'ayeme fe na nkañetane wom ô ne bebela.

Besusu'a mebatan

13 Me bili abui mam ya tili wo, ve me nji nye'e m'atili a nkôs nge tiñeti ; 14 me bili ndinlem na me mbeme zu yene wo, nde bi aye kobô bi lôane mesu.

15 Mvo'é é bo'o e be wo. Bemvôé b'abatane wo. O bata'ane me bemvôé ô tote be môé.



Rev. Matthias MEYE
Secrétaire Général 1961.....